

Qanoq ililluta nunatsinni e-sport timersoriaatsitut allatulli pisortatigoortumik akuerineqarsinnaanera qulakkeerneqarsinnaanersoq, aningaasatigullu taperneqarsinnaanerannik periarfissat pillugit apeqquteqaat aallaavigalugu oqallisissiatut siunnersuut.

(Inatsisartunut ilaasortaq, Aqqalu C. Jerimiassen, Atassut)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Naalakkersuisut Aqqalu C. Jerimiassenip, Atassut, apeqquteqaat aallaavigalugu oqallisissiatut siunnersuutaanut qujarusupput.

E-sport nunarsuaq tamakkerlugu nunatsinnilu sukkasuumik ineriartorsimavoq tammarallarunnaranilu. Taamaammat sunngiffimmi aliikkutarilikkamut, ingammik inuusunnerusut atugarillualigaannut, ileqqorissaarnermik pitsaasumik pilersitseqataaginnarniarta.

E-sport uagutsinnut nunarsuullu sinneranut nutaarluinnaavoq. Taamaattumik qanoq aaqqissugaanera aammalu inunnut inuullu avatangiisaanut qanoq sunniuteqartarnersoq siunissamilu uagutsinnut qanoq sunniuteqarumaarnermoq pillugit ilisimasakitsuaraavugut. Taamaattoq nunat allat ileqquulersumut tunngatillugu qanoq qisuariaateqarsimanersut qiviarsinnaavagut.

Esport Danmark tassaavoq Danmarkip e-sportertartuisa pisortatigoortumik kattuffiat 2007-imi pilersinneqartoq kingornalu kattuffik International E-sports Forbundimik pilersitseqataasuulluni. E-sportip siuarsarneqarnissaanut, tassunga ilanngullugit e-sportimik aaqqissuussanik ingerlatsisoqarnissaanut Esport Danmarkip pilersinneqarneranit ukiut qulit qaangiunneranni kattuffimmut Danmarkimi Folketingimit aningaasanik immikkoortitsisoqarsimavoq.

Taamaakkaluartoq Danmarks Idrætsforbundip e-sport timersuutitut akuerisimangilaa. Timersoriaasitoqaq e-sportilu arlalippassuartigut assigiinngissuteqarput. Malittarisassat timersuummut tunngasut taakkua ilagivaat. Nukkassaatinik atuineq, peqquserlunneq pissutsillu allat inummut timersuutinullu innarliisinnaasut pinaveersaartinniarlugit nunani tamalaani timersornermut tunngatillugu ataatsimut malittarisassaqqarpoq. Taamaattumik Naalakkersuisut susassaqqartut peqatigiiffiliornissaannik killiliussanillu pilersitseqataannissaannik kajumissaariinnarsinnaapput.

Timersuutit allat timimut sunniutigisartagaasa assinganik e-sport immaqqa sunniuteqarneq ajorpoq, taamaakkaluartoq qaratsamut sunniuteqartarpoq ajortuinnaangitsunik, aammali

oqaatsitigut, ileqqorissaarnissamut, periaatsinik allarpassuarnillu meeqqanut inuusuttunullu ineriartuutaasinnaavoq.

Naalackersuisut e-sportip timersoriaatsitulli allatulli pisortatigut akuerineqarnissaanut tunngatillugu apeqqummut Timersorneq timigissarnerlu pillugit Inatsisartut inatsisaat nr. 15, 6. juni 2016-imeersumut innersuussisinnaapput, matumani timersorneq timigissarniarluni aamma peqqissarniarluni timi atorlugu sammisaqarnertut nassuiarneqarpoq. Kaloriat timimi uunneqartillugit imaluunniit inuit ataasiakkaat timikkut atugarissaarnerat peqqinnerallu nukittorsarniarlugu timi atorlugu sammisaqarnertut timigissarneq nassuiarneqarpoq.

Timersorneq pillugu inatsimmut oqaaseqaatini takuneqarsinnaavoq "timersorneq" aamma "timigissarneq" pineqartuni tamani inatsimmi taaguuserneqareernerisigut pineqartut tamarmik timip aalatinnissaanut attuumassuteqartut. Tamatuma kinguneraa, timersuutit timip aalatinnissaanut tunngassuteqanngitsut inatsimmi atuutsinneqannginneri. Taakku nalinginnaasumik taaneqartarput "eqqarsaasorsorluni timersorneq" tassaniillutillu assersuutigalugu skak aamma backgammon. E-sport tassunga atatillugu taaneqanngilaq, kisianni nalilernerqarsinnaavoq, inatsimmi piumasaqaataasoq, tassa timigissarniarluni peqqissarniarlunilu timimik aalatitsineq, naammassineqanngitsaq, taamaalillunilu e-sport timersornermut inatsit naapertorlugu timersornertut isigineqanngitsaq. Ileqqulersuulli siuariartupiloortoq, inuusuttut sunngiffinni aliikkutarisaannik allannguisoq isiginngitsuusaarnianngilarput, taamaattumillu nalilersortariaqassavarput, qanoq sinaakkusersussanerlugu.

Kinaluunniit inerteqqutaanngitsumik siunertalimmik peqatigiiffilorsinnaavoq. Aningaasanoorutit ilaannit aningaasanik agguaassisarneq pillugu tapeeriaatsit, tapiiffigineqarnissamut piumasaqaatit il.il. pillugit Namminersorlutik Oqartussat nalunaarutaat nr. 2, 26. januar 2015-imeersoq, naapertorlugu nuna tamakkerlugu peqatigiiffinnut kattuffinnullu tapiissuteqarsinnaapput. Taamaalillutik Naalackersuisut pineqartut peqatigiiffilornissaannik siullertullu Kalaallit Nunaanni Timersoqatigiiffiup oqaloqatiginissaanik isumaliuteqarnissaannik kajumissaarusuppaat.

Naalackersuisuniit taamatut oqaaseqarluta inersuarmi soqutiginarlutik oqallittoqarnissaa qilanaaraarput.